



Sesida dals

28 d'avrigl 2020

Communitgà ils

30 d'avrigl 2020

Protocol nr.

354

Incumbensa Niggli (Samedan)

concernent la colliaziun da la piazza aviatica regiunala «Engadin Airport» cun il Forum economic mundial (WEF) a Tavau

Resposta da la Regenza

A la Dieta annuala dal Forum economic mundial (WEF) prendan part mintga onn var 3000 participantas e participants da l'economia, da la politica, da la scienza e da la cultura. Mo ina pitschna part da questas persunas giauda protecziun internaziunala (per exempel scheffas u schefs da stadis, scheffas e schefs da regenzas sco er ministras e ministers), e puspè mo per ina part da questa gruppa da persunas sto la Polizia prender mesiras da protecziun. Quai signifitga che la gronda part da las persunas che prendan part a la Dieta annuala dal WEF, entran e pon sa mover en Svizra senza mesiras da protecziun supplementaras/spezialas.

Las sutsegnadras ed ils sutsegnaders vulan dar a la Regenza l'incumbensa da sclerir trais puncts:

Tar il punct 1: La Fundaziun Forum economic mundial sco organisatura da la Dieta annuala a Tavau permetta a sias participantas e ses participants da tscherner libramain lur med da transport per l'arriv e per la partenza, ed ella n'ha nagins contracts cun interpresas da transport, particularmain cun plazzas aviaticas. Ils arrivs e las partenzas vegnan organisads individualmain. Las entradas en Svizra, tant dal territori da Schengen sco er da l'ulteriur territori, pon vegnir regladas gia oz senza problems en il Engadin Airport. Er l'entrada en Svizra da persunas protegidas tenor il dretg internaziunal è pussaivla senza mesiras da protecziun spezialas. Da cumplettar èsi ch'il spazi d'aria è serrà durant la Dieta annuala dal WEF. Tenor il cumond da la Aviatica militara na dastga pia il proceder GPS existent per sgols d'arriv betg vegnir applitgà,

ed ils sgols d'arriv e da partenza ston capitar a vista, sche la permissiun d'atterrar respectivamain da partir è avant maun.

Tar il punct 2: En il rom da la Dieta annuala dal WEF na prepara la Polizia chantunala dal Grischun nagin dispositiv da segirezza per la piazza aviatica Altenrhein. Sco ch'igl è gia vegnì mussà qua survart, n'èn necessarias naginas mesiras da protecziun spezialas tenor il dretg internaziunal per la gronda part da las participantas e dals participants da congress. Plinavant èsi chausa da la piazza aviatica respectiva da prender las mesiras da segirezza necessarias, per exempel per jets privats parcads. Sch'ina persuna protegida tenor il dretg internaziunal arrivass en Svizra sur il Engadin Airport, giuditgass il Servetsch federal da segirezza la periclitaziun da questa persuna e proponiss mesiras da protecziun correspondentas che la Polizia chantunala realisass temporarmain sin la piazza aviatica. Questas mesiras da protecziun fissan relativamain custavlas, tut tenor la persuna e tut tenor las circumstanzas concretas.

Tar il punct 3: Sco ch'igl è gia vegnì preschentà qua survart, pudess entrar en Svizra gia oz la pli gronda part da las participantas e dals participants da congress sur il Engadin Airport. Sche persunas protegidas tenor il dretg internaziunal che han in tschert basegn da protecziun entrassan en Svizra sur il Engadin Airport, stuess la Polizia chantunala – en coordinaziun cun la gestunaria da la piazza aviatica – realisar temporarmain las mesiras da protecziun che fissan necessarias en il cas concret.

Ils puncts menziunads en l'incumbensa han gia pudì vegnir sclerids.

Sa basond sin questas explicaziuns propona la Regenza al Cussegl grond da stritgar questa incumbensa.



Il president:

Dr. Chr. Rathgeb

En num da la Regenza

Il chancelier:

Daniel Spadin